

每週經課朗誦經文(巴克禮漢羅/教羅)2013/04/21

共同經課 - 1 使徒行傳九章三十六節~四十三節

36 Tī Iok-phàⁿ 有一個女徒，名 Tāi-pí-tāi，翻譯就是 To-ka：行好事 kap 賑濟滿滿。37 當時破病死；人洗伊 ê 身屍，hē tī 樓頂。38 Lū-tāi 近 Iok-phàⁿ，學生聽見彼得 tī hia，就差兩人去 chhē 伊，求講，請來阮 chia, m-thang iân-chhiân。39 彼得就起身 kap in 去。已經到，chhoā 伊上樓；眾守寡人 khiā tī 彼得 ê 身邊，teh 哮，將 To-ka kap in tī-teh ê 時所做 ê 衣服 hō伊看。40 彼得就 kah 眾人出去，跪落去，祈禱；oát-tng 身 òng 身屍，講 Tāi-pí-tāi，起來。伊 ê 目睷 thī 開；看見彼得，就起來坐。41 彼得伸手扶伊起來，叫 chiah-ê 聖徒 kap 守寡人入來，將 koh 活 ê To-ka 交 hō in。42 Thong Iok-phàⁿ lóng 知；就有 choē-choē 人信主。43 彼得 tī Iok-phàⁿ 久久 kap 一個鞞皮師傅西門 saⁿ-kap toà。

共同經課 - 2 詩篇二十三篇

1 大衛 ê 詩。1) 耶和華是我 ê 牧者，我無欠缺。2 伊 hō我倒 tī 青翠 ê 草埔； Chhoā 我 tī 安靜 ê 水邊。3 伊 hō我 ê 靈魂精英； 爲 tiòh 伊 ê 名，chhoā 我行義 ê 路。4 我雖然行過死蔭 ê 山谷，亦 m驚災害； 因爲你 kap 我 tī-teh； 你 ê thui，你 ê 拐，安慰我。5 Tī 我對敵 ê 面前，你 kā 我排設筵席； 你用油抹我 ê 頭殼； 我 ê 杯滿出來。6 恩典 kap 慈悲的確 tè 我到一世人； 我 beh 永遠 khiā 起 tī 耶和華 ê 厝。

共同經課 - 3 啟示錄七章九節~十七節

9 Chiah-ê tāi-chì 了後，我看見有 kui 大陣 ê 人，無人會算伊 ê 數額，出 tī ták 國，ták 族，ták 號百姓，ták 樣腔口 ê，khiā tī 座位 ê 面前，穿白衫，手 kiáh 棕樹枝；10 大聲叫講，願拯救歸 tī 咱 ê 上帝，就是坐座位 ê，kap tī 羊羔。11 眾天使 khiā tī 座位 kap 長老 kap 四個活物 ê 周圍，面仆 tī 座位前，敬拜上帝，講，À-bēng：12 願 o-ló、榮光、智慧、感謝、尊貴、權能、氣力歸 tī 咱 ê 上帝，到代代無盡。À-bēng。13 長老 ê 中間有一個應我講，Chiah-ê 穿白衫 ê 是 chī-chūi？tùi tá-lòh 來 ah？14 我 kā 伊講，我 ê 主 ah，你知。伊 kā 我講，Chiah-ê 是 tùi hit-ê 大 ê 患難出來 ê，bat tī 羊羔 ê 血洗 in ê 衫到白白。15 所以 in tī 上帝 ê 座位前，koh tī 伊 ê 殿暝日服事伊；坐 tī 座位 ê beh khiā 起 tī in ê 中間，來致蔭 in。16 In 無 koh iau，也無 koh 嘴乾；日 kap 一切 ê 熱 boē pek-tiòh in。17 因爲座位中 ê 羊羔 beh 做 in ê 牧者，chhoā in 到活 ê 水泉；koh 上帝 beh tùi in ê 目睷拭去 in lóng 總 ê 目屎。

共同經課 - 4 約翰福音十章二十二節~三十節

22 Tī 耶路撒冷，有獻殿節，是冬天時；23 耶穌 tī 殿裡，行 tī 所羅門 ê léng 廊。24 猶太人圍攔，來 kā 伊講，你 hō阮 ê 心躊躇，beh 到甚麼時 ah？25 你若是基督，tiòh 明明 kā 阮講。耶穌應講，我 bat kā lín 講，但是 lín m信；我 tī 我 ê 父 ê 名所行 ê 事，chiah-ê 是做我 ê 干證。26 若是 lín m信，因爲 lín m是我 ê 羊。27 我 ê 羊聽我 ê 聲，我 bat in，in 亦 tè 我；28 koh 我 hō in 有永活；in 決斷永遠 boē 沉淪；無一個能 tùi 我 ê 手搶 in 去。29 我 ê 父，就是用羊 hō我 ê，khah 大萬項有；無一個能 tùi 父 ê 手搶去。30 我 kap 父是一個。